



Sesida dal

1. da settember 2020

Communitgà ils

3 da settember 2020

Protocol nr.

720

Incumbensa Brunold

concernent la politica davart il luf sin plaun federal

Resposta da la Regenza

En vista a l'augment dal squitsch dal luf è represchentants da la Regenza gia sa scuntrads per in barat cun puras e purs pertutgads sco er cun represchentants da differentas uniuns e federaziuns. Il tema è ils cas frequents da nursas e da chauras stgarpadas da lufs sin in spazi concentrà cunzunt en la regiun Surselva sco er il quità per la segirezza dals umans pervia da midadas da cumportament tar muntaneras d'armants en territoris, nua ch'il luf è preschent. L'agricultura è pertutgada fermamain da las sfidas en connex cun il tractament d'animals da rapina gronds. Il svilup d'in cumportament che chaschuna conflicts da singuls lufs e da singuls trieps è evident sin basa dals eveniments durant quest onn. Er pervia da las attatgas sin armants ha la problematica dal luf cuntanschì ina nova dimensiun. Betg sco ultim ha quai er consequenzas per il turissem en noss chantun.

Ils represchentants dals differentes uffizis, particularmain da l'Uffizi da chatscha e pestga, da l'Uffizi per la segirezza da victualias e per la sanadad d'animals sco er dal Plantahof, èn permanentamain en contact cun las autoritads federalas, saja quai areguard la protecziun da muntaneras, areguard la regulaziun da lufs, areguard la segirezza dal persunal d'alp sco er da las passantas e dals passants ubain er areguard l'ulteriur svilup da la revisiun da la Lescha da chatscha (e sia realisaziun). Davart la Lescha da chatscha vegni decidì il settember 2020. L'onn 2020 ha il chantun supplitgà la Confederaziun d'analisar il potenzial da periclitaziun che resulta per umans pervia dal cumportament da defensiun dals armants en territoris, nua ch'il luf è preschent. Correspudentamain è vegnì inizià in project "Vatga-mamma ed animals da rapina gronds". Quest project ha survegnì ina gronda impurtanza.

Er la Regenza è s'engaschada gia pliras giadas tar la Confederaziun ed ha appellà da prender serius las differentas problematicas concernent il luf e da s'engaschar per vias ad ina soluziun. L'ultima giada è la presidenta da la Confederaziun resp. la Confederaziun vegnidas supplitgadas da la Regenza il zercladur 2020 da vulair repassar la comunicaziun en chausa luf, e quai sco med fitg impurtant per du-

magnar e per sviluppar vinavant il tema, sco er da focussar sin las relaziuns e sin ils basegns actuals da la populaziun e dals acturs en l'agricultura, en il turissem ed en ulteriuras branschas, ch'èn pertutgads economicamain. Plinavant èsi vegnì fatg attent ch'i dovra buns instruments per dumagnar las sfidas e la problematica en connex cun la preschientscha dal luf e da la tegnida d'animals da niz; correspundentamain èsi vegnì pretendì che la Confederaziun surpiglia da metter a disposiziun instruments en il champ da tensiun ed en il senn descrit. La situaziun dad oz cun questa enorma densità da trieps en noss chantun resp. en la Surselva na po betg esser in stadi ch'ins mo accepta, er betg sut l'aspect ch'ins vegn a stuair far frunt a questa situaziun cun las medemas basas e cun las medemas mesiras giuridicas sco en il rest da la Svizra. En quest senn valessi la paina da perseguitar er l'idea che la populaziun da lufs vegniss definida areguard sia dimensiun per l'entira Svizra e vegniss repartida proporziunalmain sin ils chantuns. Perquai che las pussaivladads dal chantun èn limitadas areguard la tematica dal luf, saja quai en connex cun la regulaziun, saja quai en connex cun la protecziun da muntaneras, però er en connex cun dumondas da la responsabladad u da natira turistica (viandantas e viandants/bikers e bikras, sendas da viandar e.u.v.), èsi d'ina impurtanza decisiva che la Confederaziun renconuschia la situaziun ed ils quitads da las parts pertutgadas ed – en il rom da sias pussaivladads – elavuria u almain sustegnia soluziuns.

Correspondentamain considereschan la Regenza sco er ils posts chantunals cumpetents quai che vegn pretendì en l'incumbensa sco ina incumbensa permanenta. Tar la Confederaziun vegnan els a s'engaschar sin tut ils plauns per ch'i vegnia tegnì quint commensuradamain dals interess impurtants da l'agricultura e dal turissem sco er da la segirezza dals umans, particularmain er considerond l'interess d'ina protecziun dals animals da rapina gronds.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Il chancelier:

A handwritten signature in black ink, appearing to be "Chr. Rathgeb".

Dr. Chr. Rathgeb

A handwritten signature in black ink, appearing to be "Daniel Spadin".

Daniel Spadin